

III. OUTRAS DISPOSICIÓNS

CONSELLERÍA DE EMPREGO, COMERCIO E EMIGRACIÓN

ORDE do 15 de setembro de 2025 pola que se amplía o período subvencionable e o prazo de xustificación das subvencións convocadas ao abeiro da Orde do 30 de xaneiro de 2025 pola que se establecen as bases reguladoras para a concesión, en réxime de concorrencia non competitiva, de subvencións para o impulso da innovación e sostibilidade do comercio local e artesanal e se procede á súa convocatoria para o ano 2025 (código de procedemento CO300C).

Mediante a Orde do 30 de xaneiro de 2025 (DOG núm. 31, do 14 de febreiro) establécense as bases reguladoras para a concesión, en réxime de concorrencia competitiva, de subvencións para o impulso da innovación e sostibilidade do comercio local e artesanal e se procede á súa convocatoria para o ano 2025 (código de procedemento CO300C).

O parágrafo segundo do artigo 1.3 das bases reguladoras establece que «En concreto, consideraranse subvencionables as actuacións previstas no artigo 4 destas bases reguladoras sempre que sexan realizadas e efectivamente pagadas desde o 1 de decembro de 2024 ata o 30 de setembro de 2025, pola incidencia que nos sectores do comercio e da artesanía teñen tanto o período de rebaixas de inverno como a campaña de Nadal, que son para moitos establecementos o momento idóneo para o lanzamento de novas propostas comerciais, en establecementos e a través da canle dixital».

Pola súa banda, o artigo 18 das bases reguladoras dispón que «O pagamento da subvención quedará condicionado á presentación da documentación xustificativa do investimento realizado segundo o modelo do anexo IX, na forma sinalada no artigo 7 da convocatoria e ata o 30 de setembro de 2025».

Tendo en conta o longo proceso de revisión e concesión das solicitudes, e dado que non se causa prexuízo a terceiros, procede modificar os artigos 1.3 e 18.1 das bases reguladoras para ampliar o prazo de xustificación ata unha data que permita unha mellor xustificación da subvención por parte das persoas beneficiarias.

A teor do exposto, en virtude das competencias que ten atribuídas a Consellería de Emprego, Comercio e Emigración en materia de comercio interior, e no exercicio das atribucións que me foron conferidas,



DISPOÑO:

Artigo 1. *Modificación do artigo 1.3 das bases reguladoras da Orde do 30 de xaneiro de 2025 pola que se establecen as bases reguladoras para a concesión, en réxime de concorrencia non competitiva, de subvencións para o impulso da innovación e sostibilidade do comercio local e artesanal e se procede á súa convocatoria para o ano 2025 (código de procedemento CO300C)*

O segundo parágrafo do artigo 1.3 da referida orde queda redactado nos seguintes termos:

«En concreto, consideraranse subvencionables as actuacións previstas no artigo 4 destas bases reguladoras sempre que sexan realizadas e efectivamente pagadas desde o 1 de decembro de 2024 ata o 24 de outubro de 2025, pola incidencia que nos sectores do comercio e da artesanía teñen tanto o período de rebaixas de inverno como a campaña de Nadal, que son para moitos establecementos o momento idóneo para o lanzamento de novas propostas comerciais, en establecementos e a través da canle dixital».

Artigo 2. *Modificación do artigo 18, número 1, das bases reguladoras da Orde do 30 de xaneiro de 2025 pola que se establecen as bases reguladoras para a concesión, en réxime de concorrencia non competitiva, de subvencións para o impulso da innovación e sostibilidade do comercio local e artesanal e se procede á súa convocatoria para o ano 2025 (código de procedemento CO300C)*

O artigo 18.1 queda redactado nos seguintes termos:

«O pagamento da subvención quedará condicionado á presentación da documentación xustificativa do investimento realizado segundo o modelo do anexo IX, na forma sinalada no artigo 7 da convocatoria e ata o 24 de outubro de 2025; xunto con este anexo presentárase a seguinte documentación:»

Disposición derradeira única. *Entrada en vigor*

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 15 de setembro de 2025

José González Vázquez
Conselleiro de Emprego, Comercio e Emigración

